

# Survegniu trasparenza ellas taxas

La cuminonza dils possessurs da secundas habitaziuns da Tujetsch dumbra 300 commembers

DA HANS HUONDER / ANR

■ **La cuminonza dils possessurs da secundas habitaziuns da Tujetsch ha survegniu investa ellas entradas dallas taxas da hosp e turissem. Ella ha denton era saviu seperschauer co quels daners vegnan impundi. In studi muossa tgei plivalur ch'ils possessurs ed ils hosps dallas secundas habitaziuns portan alla Val Tujetsch.** La sonda ha la cuminonza salvau sia radunonza generala a Sedrun. Biebein 100 dils rodond 300 commembers ein stai presents a quella. Igl ei stau ina radunonza cun fetg bia informaziuns e propostas co promover il turissem. En siu rapport annual ha la presidenta, *Vreni Müller-Hemmi*, resumau il curriu e passau igl onn vargau. La suprastanza ha perseguitau la finamira d'in bien dialog cun la suprastanza communal sco era culs purtaders dil turissem. Il resultat dallas treis sentupadas seigi ina megliera trasparenza el quen dallas taxas da hosps e turissem: «Quei lubescha a nus in monitoring cuntinuau sco era da giudicar criticamein co ils daners vegnan impundi.»

## Informaziuns per tudestg

La vischnaunca ha dau suatientscha al giavisch dalla cuminonza d'orientar era per tudestg davart las fatschentas communalas. Satisfatga ei la suprastanza era ch'igl ei reussiu d'includer il pass dalla loipa ella carta da hosps sigl unviern 2016/17. En discussiun ei la suprastanza dalla cuminonza era stada cun Andermatt Sedrun Sport SA sco era cun la cuminonza dils possessurs da secundas habitaziuns da Mustér. La cuminonza dils possessurs da secundas habitaziuns da Tujetsch ei sedecidida d'entrar ell'alleanza dils possessurs da secundas habitaziuns dalla Svizra. Tenor Müller-Hemmi vegn ei era fatg el Grischnu stentas per reunir las 13 cuminonzas d'interess sut il tetg d'ina semeglionta alleanza. Per propagar sia purschida ha la cuminonza ediu in flyer ed adattau sia homepage.



La presidenta dalla cuminonza, l'antieriura cussegliera nazionala *Vreni Müller-Hemmi*.

FOTO H. HUONDER

## Survegniu trasparenza

Sco quei che la suprastanza ha orientau incassescha la vischnaunca da Tujetsch annualme in 1,35 milliuns francs en fuorma da taxas da hosp e turissem. Dalla summa dad 1,05 milliuns francs dalla taxa da hosp furneschan ils possessurs da secundas habitaziuns 700 000 francs. Dil

total dad 1,35 milliuns francs van 840 000 francs – tuttna bia sco a Mustér – a Sedrun Mustér Turissem. L'atra part – rodund in miez milliun francs – va alla vischnaunca per infrastruttura ed activitads. Tenor il cassier *Kurt Baumgartner* tonscha quei miez milliun denton buca per cuvierer quels cuosts. La vischnaunca

investescha annualme in rodund 900 000 francs el turissem. Leutier cuvierera ella deficits sco per exempel dil Bogn Sedrun. En quei connex constatescha la presidenta *Vreni Müller-Hemmi*: «Buca tut quei che la vischnaunca finanziescha vegn dabien suletamein al turissem. Ils indigens profiteschan era.» La cuminonza seigi en mintga cass buca prompta d'acceptar in eventual alzament da taxas per cuvierer quels deficits. Per saver tgei che succeda culs daners dallas taxas vul la suprastanza dalla cuminonza star vinavon en stretg contact cun la suprastanza communal. Sclariment ell'impurtonza dallas secundas habitaziuns dat in'interpretaziun dil studi fatgs en quei connex a Tavau (mira emprema pagina da questa ediziun). Il studi muossa che mintga habitaziun secundara porta a Tavau ina creaziun da plivalur d'annualme in 49 550 francs. Per Tujetsch ha la cuminonza quintau cun duas tiarzas da quella summa e vegn aschia tier ina creaziun da plivalur da 29 milliuns francs entras las 1100 habitaziuns secundaras.

## Ideas co promover il turissem

Alla radunonza han suprastontas e suprastonts dalla cuminonza presentau lavurs fatgas il davos temp. Aschia ha la suprastanza elavurau in fil tgietschen davart sias finamiras e la filosofia dalla cuminonza. Il focus duei esser fixaus sin in turissem ecologic, mo era economic e social. Ei seigi da promover il traffic public, nezegiar ils products indigens, mo era sustener la cultura, denter auter il romontsch. Per promover activitads extraordinarias ha la suprastanza proponiu da scaffir in premi special (mira finiastra). La cuminonza ei dil meini che Sedrun e Mustér dueien dar era egl avegnir peisa al turissem cun famiglias. Sper la purschida gratuita instradada avon dus onns seigi ei necessari da scaffir in program da rama analog a quel ch'ins havevi pli baul per la stad. Leutier fussi ei d'engrau da porscher ina survigilonza d'affons pigns e loghens da sentupada per la giuventetgna. In auter gia-

visch ein prezis pli favoreivels per ir cun skis per famiglias.

## Reeligiu la suprastanza

Il settember 2015 ei la cuminonza vegnida fundada. Damai ch'igl ei strusch dus onns dapi lu ei l'entira suprastanza sedecidida da star a disposiziun per dus ulteriurs onns. Igl ei quei la presidenta *Vreni Müller-Hemmi*, *Rueras/Turitg*; il vicepresidente *Christoph Marugg*, *Rueras/Zollikerberg*; il cassier *Kurt Baumgartner*, *Sedrun/Kappel*; *Beatrice Bosshard*, *Camischolas/Meilen*; *Daniel Krähnbühl*, *Zarcuns/Turitg*; igl actuar *Markus Müller*, *Rueras/Turitg* e *Werner Strebel*, *Sedrun/Winkel*. La proxima radunonza dalla cuminonza duei danovamein vegnir cumbinata cun la Scuntrada. Uonn ei quei buca stau pusseivel. Persuenter envida la vischnaunca ad ina Scuntrada ils 16 da december 2017 cun occasiun dall'inauguraziun dalla nova halla plurivalenta a Sedrun.

## Premi «cardun d'argien»

La cuminonza dils possessurs da secundas habitaziuns da Tujetsch ha pliras finamiras, ina ei igl engaschament en favur d'in turissem persistent. Per promover quel ha la suprastanza dalla cuminonza decidiu da scaffir in premi per in engaschament creativ ni innovativ. El senumna «cardun d'argien» (*Silberdistel*). Cun quel duein persunas, instituziuns ni interpresas vegnir honoradas. Las propostas inoltradas persuenter dallas commembras e dils commembers vegnan giudicadas d'ina giuria e la finfinala premiadas. Il premi duei vegnir surdaus alla radunonza igl onn 2018. Schebein ei dat silsuenter ina cuntinuaziun da quel ei aunc buca diltut clar.

# Da baselgias tier tempels e moscheas

La Cuminonza da lavur interreligiusa en Svizra a Mustér e Glion

■ **(anr/abc) Sin siu viadi cul velo tras la Val dil Rein, Svizra orientala e Turitg ein ils giuvenils activists dalla Cuminonza da lavur interreligiusa en Svizra (Iras-Cotis) sefermai a Glion. L'organizaziun inaugurescha quest'jamna las diversas staziuns cun purschidas che promovon il dialog. Aschia a Mustér e Glion.** 20 giuvenils da tuttas regiuns dalla Svizra separticipeschan alla campagna d'ina jamna. Finamira eis ei da presentar alla publicitad ina nova purschida cun 21 staziuns respectiv loghens d'alloschi. Ei settracta da loghens nua ch'igl ei pusseivel da scuvierer la varietad religiusa dalla Svizra. Gia dagitg vivan buca pli mo catolics e reformai en nosa tiara. Ils Gedijs ein cheu da casa dapi il temps medieval. Oz dat ei aunc autras cuminonzas. La finamira dalla campagna eis ei d'emprerder d'enconuscher quellas tuttas, da promover il dialog sco era da far frunt e smuinir pregiudezis.

## Sminuir pregiudezis

Dumengia han 10 participonts entschiet sil Pass Alps l'emprema etappa dalla campagna. Per la Cuminonza da lavur interreligiusa en Svizra (Iras-Cotis) cun sedia a Turitg eis ei la tiarza peuga da sias finamiras. Sper organisar mintg'onn il november l'jamna dallas religiuns ell'entira Svizra, ed edir il calendar interreligiun dils fraus, duei la

campagna «Dialogue en route» porscher la pussevilladad directa d'ir sin viadi. Ella Svizra orientala e Turitg separticipeschan 21 staziuns alla campagna. Dapertut leu san ils giuvenils emprerder d'enconuscher la religiuun specifica ch'ei leu da casa.

Dumengia ha fra *Martin Hieronymus* dalla claustra da Mustér beneventau ed accumpignau els dall'Alps tochen giu Mustér. El pli vegl convent el nord dallas Alps han els tschenau, han giu caschun d'emprerder d'enconuscher igl avat, ils conventuals e lur regla benedictina. Leu han ils giuvenils giu gl'emprer dialog interreligiun. A Mustér han els surdau igl emblem dalla campagna nova. Ei settracta d'in bustab grond «D» da metal che envida d'entrar en dialog. Cun guids locals emprendan ils viandonts lu d'enconuscher ils connex culla religiuun resp. confessiun da quei liug.

Ed ier ein ils giuvenils arrivai a Glion. Leu ha *Rino Caduff*, president dalla societad Anna Catrina SA, beneventau els el marcau vegl. Ella cuort dil Museum Regional Surselva ha el exprimiu siu placher che la cuminonza Iras-Cotis andrezza era a Glion ina dallas 21 staziuns. *Annina Schlatter* e *Gian Rudin*, dus menaders dalla campagna, han surdau ad el ed a Rino Caduff la tabla culla damonda provoconta «Drova ei religiuun?» ed igl emblem «D» sco a Mustér.

## Dalla catedrala ella moschea

La campagna «Dialogue en route» entscheiva en tuttas regiuns svizas. Sil viadi tras la Val dil Rein tochen Sogn Gagl, Kreuzlingen, Schaffusa e Turitg dat ei numerusas caschuns d'entrar en dialog interreligiun. A Glion ha quei evidentamein connex culla Reformaziun grischna e culla

claustra dallas soras dominicanas. Il president communal dad Ilanz/Glion, *Aurelio Casanova*, ha rendiu attent al dialog che ha liug a Glion dapi 500 onns. A Glion vivan buca mo catolics e reformai, cheu dat ei era ina baselgia libra evangelica ed ina baselgia neoapostolica. Oz arriva la gruppa da viadi dad Iras-Cotis a Cuera. Vinavon pedallan

els dil Rein giu tochen ad Altstätten nua ch'els visetan l'uniun culturala serba. A Sogn Gagl dat ei ina guidada tier la cuminonza locala islama ed ella catedrala. Alla fin dall'jamna fa la gruppa staziun ad Opfikon/Turitg el tempel da Shiva dils Singales.

Ulteriuras informaziuns tier quella campagna mira era sut: [www.iras-cotis.ch](http://www.iras-cotis.ch)



«Dialogue en route» a Glion. *Rino Caduff* muossa la tabla culla damonda provoconta. Il president communal *Aurelio Casanova* porta igl emblem «D» ch'animescha al dialog.

FOTO A. BEELI